

Afɛ mgbi iPol mbi ama onoyɛɛ Emi Efesu

¹ Afɛ nɛ kye mbi ani iPol, inggise ogbikye iKrestu iYesu mi oweka mgbi Imgbasho, le kɛ mbi emi osaan mi Efesu, dafi ema duu le kyo saan mi ifu iKrestu iYesu mani.

² Elela yi iyu mgbi Imgbasho Otseyi beyi Otɛ iYesu iKrestu no dɛɛ yi ema.

Mse nkyɛ mbi iKrestu mi onodzi

³ Ba ni eyi tɛ Imgbasho Otsɔ Otɛ mgbi eyi iYesu iKrestu, nkyɛ mse ongwi onodzi duu bɛ eyi ewo mi esho mbi iKrestu nani.

⁴ Ikyesinɛ o sadu eyi mbi iKrestu gbɛɛ ni eyi li mgban duuse o wa ta ɛɛ ikyegbɛɛ, ni eyi le saan di dɛɛ yi okpekpe ewo ba mi inai ongwu.

⁵ Mi okpitukwu, Imgbasho teyi weka gbɛɛ ikpewo iYesu iKrestu, ongwu ka nu eyi yɛɛ emi ongwan, mi omyɛɛ-myɛɛ beyi oweka mgban mani.

⁶ Ba ni i tɛ Imgbasho mi elela mgban okwɔkwɔ, ngwi o kye nu eyi ayayi mi ikpewo ongwan nkpan itukwu nani.

⁷ Mi eyi mgbi ongwan ma, eyi tu owatɔ-watɔ beyi odzita inggise yi ali ibwubwe, mi aludu elela mgbi Imgbasho

⁸ ngwi o kye nu eyi dzii mi ali ozoyeye beyi odifwi-difwi duu mani.

⁹ O di nu eyi ye ungwɔ odaada mgbi owitukwu mgban mi oweka mgban osuse, ngwi o tsewe mbi iKrestu nani.

¹⁰ Ikyegbɛɛ ni onɔ ma wa gyo yo, o ka kyi gbelu alungwɔ mi esho yi ese duu kwakye mbonyi mbi iKrestu.

¹¹ Mbi iKrestu Imgbasho nu eyi okwude, bana o teyi sadu eyi di kyo alungwɔ duu mi oweka mgban.

¹² Imgbasho kyungwɔne ikyegbɛɛ, eyi ama nli emi ababɔ onoyeye mbi iKrestu ma, ni eyi kye otseetse yi okwɔkwɔ ba mbi Imgbasho.

¹³ Nghanɛ ema kpaa woto mbi iKrestu onɔ ngwi ema fwo elodze otsitsi, Eso Osuse mgbi owatɔ-watɔ mgbi ema mani. Ngwi ema noyeye nɛ, a kye ambɛ mgban mgbi ondu odzeedze mgbi Onodzi Osaan na dze ema.

¹⁴ Onodzi na di nu eyi ye saan gbɛɛ, Imgbasho ka kye okwude ngwi o kye dze emidan ma nu eyi, di tso gbɛɛ eyi li mgban, taman a ka nu Imgbasho mmwe di tsan.

Angba otaata yi ibɔ

¹⁵ Mi itɔdze nɛ, kye onɔ ngwi ani fwo oyeye onuunu mgbi ema mbi Otse iYesu yi okpitukwu mgbi ema mbi emi osaan duu ma,

¹⁶ n yama nya ota Imgbasho angba ikye ema waba, dile we ema mi ibɔ mgben alonɔ duu.

¹⁷ Alonani li le bibɔ gbɛɛ ni Imgbasho mgbi Otse mgbi eyi iYesu iKrestu, Otsɔ okwɔkwɔ, no nu ema onodzi mgbi ozoyeye yi iba, adzi ni ema yen saan.

¹⁸ N di bibɔ gbɛɛ o ki kwulu ema ine ongwɔ itukwu ikyegbɛɛ ni ema ye ewe ogbe byiibyi ngwi

o kwu ema ela ikyen, yi okwudε aludu mgban okwɔkwɔ ngwi o kye dze ikye emi osaan mani.

¹⁹ N di bɔ gbεε ni ema ye ogbagbadzidzi mfye mgban ngwi dze ikye ama onoyeye ngwi a ka kye ungwɔ mba yan ba nani. Mfye na li mfye mgban okwulewo,

²⁰ ngwi o kyɔ mbi iKrestu onɔ ngwi o kyilen mi ikwongye di kyon sɔkε abugye mgban mi esho mani.

²¹ O non ngha ali utɔ okyɔɔkyɔ duu yi mfye yi εnεpε beyi onghaangha, beyi ali itɔ iyi ongwi a ka kwu inggise mi εse nε duu, li mi εse ongwi onεnε ta ba, ongwi iyayi kpaa.

²² Nghane Imgbasho kye alungwɔ duu dɔn ubɔ di non li ikye mi alungwɔ duu mi okwakyε mgbi emi iKrestu.

²³ Okwakyε mgbi emi iKrestu na li ewo mgbi iKrestu, ngwi li ombwumbwo mgbi alungwɔ duu mi ali ofε duu aali.

2

Odze oshishe mi iKrestu

¹ Nose ema li ikwukwɔ mi afɔ okye twese yi Imgbasho mi ali ibwubwe mgbi ema.

² Ngwi ema nose kale kyεdɔ ofε mgbi εsε nε beyi ongwu nkye esuto mgbi awo teyi, onodzi na li ongwu le kyidɔ onεnε mbi ama ongha Imgbasho adɔ aani.

³ Eyi duu kpaa nose dze mi itɔ ali neni, le kyεdɔ imina mgbi itukwu mgbi eyi beyi ewo mgbi eyi, ikyenghane eyi kyɔ Imgbasho itingga, nε ni eyi ki nya bayo a kika wa kwo eyi adɔ.

⁴ Nghaduu Imgbasho nshewo mi elela odiidi, mi ikye okpitukwu mgban okwulewo mi ikye eyi nɛ,

⁵ o nu eyi dɛ oshishe yi iKrestu onɔ ngwi eyi li ikwukwɔ mi alobube ma kpaa, li mi elela mgbi Imgbasho ngwi a nu ema wato aani.

⁶ Imgbasho di kyile eyi mi ikwu ungwonyi yi iKrestu iYesu di nu eyi so biyan mi esuto onzwi esho,

⁷ ikyegbɛɛ ni ongwu wa kye aludu mgbi elela mgbi ongwu ngwi o kye tso eyi mi mse mgban mbi iKrestu iYesu, ngwi a ka kye unkonyi mba yan gbɛ ba na tso eto ama nkawa ba mani.

⁸ Lubana li mi elela ngwi a nu ema wato, ikpewo oyɛyɛ onuunu, li mi ido mgbi ema abuema ba, li umba mgbi Imgbasho.

⁹ Li mi ido okyɔɔkyɔ ba, nghanɛ inggise onyi no ka tsaabo igɛɛ ba.

¹⁰ Bana eyi li idabo mgbi Imgbasho, ngwi o ta mbi iKrestu iYesu okyido ama osuse, ngwi Imgbasho tsekise kye mɛlu dzɛkɛ mi ikye eyi gbɛɛ ni eyi wa kyo mani.

Ondonyi mi ifu iKrestu

¹¹ Nghanɛ, wɛ na gbɛɛ ema ama nli imba mgbi Udzengye ngwu ama nkwi ewoma gbɛɛ emi ikye na (ikye ngwi a li kye mi abo) li kwu ema gbɛɛ ama okyiikye ba,

¹² mi onɔ na ema dɛ yi iKrestu waba. Ema li imba mgbi emi Israi ba, ema di wodɛ ondu odzɛɛdɛ ngwi Imgbasho dɛ yi ama ma ba. Ema to ɛsɛ nɛ yi ɛwɛ ogbe byiibyi ba ema di dɛ yi Imgbasho ba.

¹³ Nghaduu onene mbi iKrestu iYesu yɔ, ema ama nose ndze mbombo ma, mi eyi mgbi iKrestu a yile ema ba kwekwe.

¹⁴ Lubana iKrestu abuan li iyu mgbi eyi, emi iJuda beyi Udzengye. Yi ewo mgban o kyi ngwɔɔ ogbua-gbua yi ikyili ndze idzidze mgbi ama mani.

¹⁵ Ikye okyi ngwɔɔ ola yi adɔ okwookwo beyi mfyɛ mgban duu. iKrestu yile emi iJuda beyi Udzengye kwakye yi eka dafi a li onyi mani, ikyenghane o ba yi iyu.

¹⁶ Ma mi ikpewo mgban onyi ne, o yile emi iJuda beyi Udzengye gyiide yi Imgbasho mi ekwatsi, mi okyi ngwɔɔ ikyili mgbi ama.

¹⁷ O ba wa gbeeso iyu nya ema Udzengye ama nfyata yi Imgbasho yi emi iJuda ama nto kwekwe yi Imgbasho.

¹⁸ Ikyesine ikpewo iYesu yɔ, eyi duu ka ba mbi Otseyi Imgbasho yi Onodzi onyi.

¹⁹ Nghane ema li ingyoga naadi Udzengye wuba, kpaa ema li imba yi emi osaan di li eto mgbi Imgbasho kpaa,

²⁰ ngwi a mbe mi itozu mgbi ama ogbikye iYesu beyi ama ogbese, ngwi iKrestu iYesu abuan li okɔtɔndzi ikwutse okwulu ikye ozu nani.

²¹ Li iYesu kwulu ozu ne blii di non she yeɛ ozu osaan mgbi Otse aani.

²² Ma ema kpaa li aye ozu ngwi iKrestu mbe nli imbe ngwi Onodzi mgbi Imgbasho li la.

3

IPol ongye ogbeeso nya Udzengye

¹ Ikyenghane, ani iPol, ani li inggise obawi mgbi iKrestu iYesu mi ikye eso ngwi ani le gbo nya ema Udzengye neni.

² Li otsitsi ema fwo odze ido mgbi elela mgbi Imgbasho ngwi o kye nu ani mi ikye ema neni,

³ ngwi li, iba ngwi Imgbasho kye tso ani, ngwi ani teyi lon gwee mani.

⁴ Ni ema gbɔn ta, ema ka yagba tu osa ngwi ani dzeyan mi iba mgbi iKrestu neni,

⁵ ngwi a nu eto emi iyikpa ntona yen ba, dafi Onodzi kye tso emidi Imgbasho ama osaan ama ogbikye iYesu beyi ama ogbeese onene neni.

⁶ Ungwo odaada ne tso gbɛɛ, Eso Osuse ne nu Udzengye yɛɛ ama ogyokwude ungwonyi yi emi Israi, di yɛɛ emi ongwɛ inggise onyi, di mɛ ogbumba mgbi ondu odzɛɛdze mgbi iKrestu iYesu.

⁷ Imgbasho kyungwo osuse yi ani. O nu mfye mgban kyido mbi ani, man i yɛɛ ido mgbi ani ole gbeeso osuse kyɛ.

⁸ Dafi ani nghao yeyikpa mbi emidi Imgbasho duu ne kpaa, Imgbasho di ani elela dulu ani gbɛɛ ni ani gbo Eso Osuse nya Udzengye gbɛɛ, mbi iKrestu mse le dzii,

⁹ di nu ungwɔ odaada ama nose ngwi Imgbasho nta alungwo duu kye da ma, kye ma tsoto mi ododa mbi ali inggise duu.

¹⁰ Ta Imgbasho ka nye ikpewo okwakye mgbi emi iKrestu tso ozoyeye mgban ita idzidza-dzidza mbi ali uto yi mfye mi esho duu.

¹¹ Nene li oweka mgbi Imgbasho ndze gyegwu mani. Ongwi o kyo mbi iKrestu iYesu Otse mgbi eyi duu nani.

¹² Mbi iKrestu bɛyi oyɛyɛ onuunu mbon yɔ, eyi ka gbo tu Imgbasho yi ewo oshɛta bɛyi abɔ otsigɛgɛ.

¹³ Nghanɛ n tɛkyɛ nu ema, ka yile itukwu iyikpa ikye adzɛ mgbi ani ikye ema ba na, ikyena ka ba yi ema oyabɔ.

Ibɔ ikye emi Efesu

¹⁴ Mi itɔdzɛ nɛ n kye akwafɔ kwo esɛ mi inai Otseyi,

¹⁵ ongwu etɔ mgban mi esho yi esɛ duu tu iyi mgbi ama nani.

¹⁶ N bɔ gbɛɛ ni Imgbasho mi okwɔkwɔ mgbi aludu mgban nu ema mfye mgbi onodzi mgban ni ema yɛɛ ama okyɛdɔn kpɔklɔɔ.

¹⁷ Adzi ni iKrestu wa gyutɔ mi itukwu mgbi ema mi oyɛyɛ mgbi ema onuunu. N di bibɔ gbɛɛ, ni ema kye akpa takwulu esɛ di shewo mi okpitukwu,

¹⁸ di dze yi mfye, ungwonyi yi emi osaan, odifwi dafi okpitukwu mgbi iKrestu tsɛɛ di tunto di shigbo diye kɛ byulu mani,

¹⁹ odi ye okpitukwu mgbi iKrestu nshewo ngha ozoyeye neni, adzi ni Imgbasho kyi gbɛlu odzɛdzɛ mgbi ema duu sɔ.

²⁰ Onɛnɛ okwɔkwɔ duu no dze mbi Imgbasho! Mfye mgban nle kyidɔ mbi eyi nɛ ka kyidɔ lu kpini ngha ungwɔ ngwi eyi bɔ di tsewe mani.

²¹ Okwɔkwɔ no dze mbon dafi ngwi a li di mbi iKrestu iYesu yi okwakye mgbi emi iKrestu na nghataa gyegwu-gyegwu! No dze ngha.

4

Ondonyi mi iKrestu

¹ Ngwi ani wodze obawi ikyegbɛɛ di ani le kyo Otse ido nɛ, n tɛkyɛ nu ema, kyungwo ama nme mi ela ngwi a kwu ema nɛ na.

² Yile ewema ese kɛkɛ di dze dumɔɔ, dze yi itukwu oshiishi, to yi ewema di di ewema kpa ewema itukwu.

³ Fya mi ali ito ofɛ ni ema dze mi ondonyi mi onodzi. Kyungwɔnɛ mi odze yi eka mi iyu.

⁴ Ikpewo li onyi onodzi kpaa di li onyi, yeyɛ dafi a kwu ema ela ba ɛwe ogbe byiibyɛ onyi mi onɔ ngwi a sadu ema gbɛɛ ni ema li emi ongwe Imgbasho mani.

⁵ Otse li onyi, oyeyɛ onuunu li onyi, iBatisima kpaa li onyi;

⁶ Imgbasho li onyi di li Otsɔ ali inggise duu. Li ongwu li ikye duu, o li kyido mbi ali inggise, di dze mbi ali inggise duu.

⁷ iKrestu kye umba mgban gha nu eyi dzii dafi i minan mani.

⁸ Dafi Afe lo mani gbɛɛ,

<<Onɔ ngwi o lu esho ma, o gbe ama nwoto obawi teyi di nu inggise umba.>>

⁹ Elodze ngwi a gbɛɛ, <<O lu esho>> nɛ tso gbɛɛ o tsekise lu ibɛ.

¹⁰ Ongwu nlu ibɛ na di li ongwu kpɔɔ lu nye-nye esho aali, ikyegbɛɛ ni ongwu kpatse ali imbe duu.

¹¹ Li ongwu nu angbeka umba nu ma yɛɛ ama ogbikyon, angbeka yɛɛ ama ogbɛɛɛ, angbeka yɛɛ ama ogbeeso kye, angbeka yɛɛ ama ogbe okwakye mgbi emi iKrestu teyi, angbeka di li etsetse,

¹² ikye owo emi osaan ewo okyido mgbi iKrestu, ni ewo mgbi iKrestu she.

¹³ Ungwone ka kiyayi nghataa se eyi ka yee ondonyi mi oyeye onuunu beyi ozoyeye mgbi Ongwe Imgbasho. Taman eyi ka myotse di dze yeye dafi iKrestu nghataa ka bese.

¹⁴ Ta eyi ka dze dafi engweyeyi ngwu akpeni li gbe ma kiyayi ye ba iyikpa, ngwu awo mgbi ali otsootso duu li le fa ma kye yi ikpala, beyi ama ngwu ali mgbi ama wende ntona wuba.

¹⁵ Nghaduu ni eyi le gbo otsitsi mi okpitukwu yo, eyi ka she mi alungwo duu mbi ongwu nli ikye, iKrestu nani.

¹⁶ Li mbon ngwi alewo yi anini duu kwokyi, she di dze yi ewoma mi okpitukwu di li kyido mgbi ama idzidza-dzidza aani.

Oshishe ofufe mi ifu iKrestu

¹⁷ Nghane mi iyi mgbi Otse n le gbodze ne yilen gbo nya ema gbee, ka yama le kyo ali ikwangha dafi Udzengye li kyo mi ewe otsetse mgbi ama na ba.

¹⁸ Odifwi-difwi mgbi ama yifu di gha ma yi oshishe mgbi Imgbasho, ikyekye oyeye ba beyi itukwu otiishu mgbi ama nu ma boofe.

¹⁹ A dze yi ayiwi wuba; a kye ewoma tswoke ungwo ayayi di li kyo alungwo idza duu yi imina okiyayi.

²⁰ Ma li ofe ngwi a tso ema odze iKrestu daaba.

²¹ Mi otsitsi yo, ema fwo odze mgban a di tso otsitsi ndze mbi iYesu mani.

²² A tso ema gbee ni ema dzata oshishe mgbi ema ogbugbe nteyi mbee yi imina atsika nani.

²³ Ta a ka kyata ali ongwi itukwu mgbi ema na yɛɛ ofufɛ.

²⁴ Kye ewo ofufɛ ngwi a ta dɛɛ dafi mgbi Imgbasho mi osaan yi osaan otsitsi na wo ewo.

²⁵ Nghawane i yɛɛ kyeme ngwi ali inggise mbi ema ka nya yi onya omwaamwa dile gbo otsitsi nya inggise owatse don; lubana eyi duu li imba mgbi inggise onyi.

²⁶ <<Mi itingga mgbi ema okyockyo duu kpaa ka kyungwo obube ba na>>: Ka nu onɔ gbese tu ema yi itingga okyockyo ba,

²⁷ adzi ni olodu tu imbe okye abo byi ba mani.

²⁸ Inggise nli teyi yimi yo, i yɛɛ kyeme ngwi o ka nya yi mmyi. I gbuo no kye abo byi ungwɔ imɔ nka yan abo, gyo ngwi o ka tu ungwɔ mwa gha ama nsulun ba mani.

²⁹ Ka yama nu elodze ikwangha to lo ema mi ondu ba, kpaa no li ungwɔ ingblimo nka tobyi angbeka mi imina mgbi ama, ikye ama nfwo ma, no ya ma abo.

³⁰ Dika wulu Onodzi Osaan mgbi Imgbasho itukwu ba na, lubana li mbon ngwi a kye ambe mgbi egbe onagbe ema na dɛɛ aali.

³¹ Dzita ali itukwu nno yi itukwu olola yi itingga yi idze yi ito ofyaafya beyi ali ito ali ibwubwe duu.

³² Tatase dɛɛ yi itukwu osuse yi ewema na, le kye odze ta ewema mkpa, dafi Imgbasho kpaa kye ta ema ikpewo iKrestu nani.

5

¹ Nghawane, ngwi ema li emi ongwɛ Imgbasho ama okpan itukwu saan ne, gbaman na.

² Di dze mi oshishe mgbi okpitukwu, yeye dafi iKrestu kpaa di eyi kpan itukwu kye ewon fife osuse nu Imgbasho ikye eyi neni.

³ Nghaduu mi idzidze ema yo, nu ma ka fwo ayini odze amah kpaa ba, hona ungwɔ idza onyi ba, naadi nggwɔ kpaa ba, ikyekye ungwɔ ntonɛ li ungwɔ ama ntishi ngwi emidi Imgbasho ka kyo ba.

⁴ Ka gbɔdze ibwubwe hona odze ikwangha hona odze asha owulewo ba, ungwɔ ntonɛ duu gbuo yi emidi Imgbasho ba. Tatase yo ta Imgbasho angba.

⁵ Ye saan ta gbɛɛ, inggise amah yi inggise idza hona inggise okyo nggwɔ ka kaka esuto mgbi iKrestu hona mgbi Imgbasho ba. Lubana inggise okyo nggwɔ li ungwɔnyi yi inggise angwula, nli sunu ungwɔ emi ɛɛ ne mani.

⁶ Inggise onyi no ka kpagya ema wo yi ayayi odze ba, lubana li mi ungwɔ ntonɛ ngwi Imgbasho li kyitingga yi ama onghaado aali.

⁷ Ikyenghanɛ ka yama kyungwɔ yi ama ba na.

⁸ Lubana nose ma ema to mi iifu, nghaduu onɛnɛ ema to mi osa mgbi Otse. Nɛ kyungwɔ dafi emi ongwɛ osa na.

⁹ (Lubana owaawa mgbi osa dze yi alungwɔ osuse mi ele duu, yi osaan beyi otsitsi)

¹⁰ di fya ye ungwɔ nkpa Otse mani.

¹¹ Ka sulu unkonyi okyo yi ido mgbi iifu nsulu owawa ba na ba, tatase yo kye ma doodo ɛɛ.

¹² Lubana i kwayiwi okwu iyi ungwɔ ngwi ama onghaado li kyo mi odaada.

¹³ Kpaa ungwɔ ngwi osa non do ododa yo inɛ li di,

¹⁴ lubana li osa li nu inggise di alungwɔ duu. Li nga ngwi a gbɛɛ, <<Kyato mi ikwongye, ongye onuna, ta iKrestu ka nu abu osa.>>

¹⁵ Nghane gbewɛbyi saan mi odzɛɛdze mgbi abu, ka yama li ikwangha ba kpaa kwiine,

¹⁶ ka lɛlɛ yi onɔ mgbi abu ba, ikyekye egbe nɛ li egbe obube.

¹⁷ Ikyenghane ka li ikwangha ba, kpaa difwi owitukwu mgbi Otse.

¹⁸ Ka wa ebye fya ba, ka nu abu yɛɛ gbɔɔgbɔ, tatase yɔ ni Onodzi gbɛ abu sɔ.

¹⁹ Le gbɔdze yi ewee mi ashi obibo yi ashi osunu Imgbasho beyi ashi ongwi onodzi. Shashi di gbo ungwɔ mi itukwu nu Otse.

²⁰ Dile ta Imgbasho Otseyi angba mi alungwɔ duu, mi iyi mgbi Otse mgbi eyi iYesu iKrestu.

²¹ Siikye nu ewema ikye mmwɛ mgbi iKrestu.

Engyaa yi emi Oba ma

²² Engyaa, siikye nu obeema dafi ema li sunu Otse mani.

²³ Lubana ongyulo li ikye mgbi owan dafi iKrestu kpaa li ikye yi ongye onagbe mgbi okwakyɛ mgbi emi iKrestu, nli ewo mgban nɛni.

²⁴ Ikyenghane, dafi okwakyɛ mgbi emi iKrestu li sunu iKrestu nɛ, li nga ngwi engyaa kpaa ka siikye nu oba ma mi alungwɔ duu aali.

²⁵ Engyulo, ema kpaa di emi oweema kpa ema itukwu na, yɛɛ dafi iKrestu di okwakyɛ mgbi emi iKrestu kpan itukwu di kye oshishe mgban lasɛ ikyon nɛni.

²⁶ Ikye non yɛɛ saan, san yi eni mi elodze Imgbasho.

²⁷ IKrestu kyungwone ikye ni ongwu kye okwakyē mgbi emi iKrestu dzekē mi okwōkwō di kwangble hona ndzili ba, naadi boya ba, kpaa dze saan yi obube ba mani.

²⁸ Mi ito ofe ne kpoo, i wogyo ngwi engyulo ka di owama kpa ma itukwu dafi ewoma mani. Inggise ngwu owan kpan itukwu yo, li ewon ngwu o di kpan.

²⁹ Lubana inggise onyi di ewon tanyi ye ba, nghaduu o li byi ewon enbwa di gbewebyi ewon, yeye dafi iKrestu li gbewebyi okwakyē mgbi emi iKrestu neni,

³⁰ lubana eyi duu li emidan.

³¹ <<Mi itodze ne ongyulo ka dzita otsen yi onon ye kwokyeba yi owan man ama efa ka yee ikpewo onyi.>>

³² Ungwone li ungwō odaada kpini, nghaduu n le gbodze iKrestu yi okwakyē mgbi emi iKrestu.

³³ Dafi i dze duu kpaa, ali inggise mgbi ema no di owan kpan itukwu kyeme dafi ewon mani, ali ongyaa no di nu oban mmwe.

6

Engbe yi ama omba ma

¹ Engbe, li ayin ni ema sunu ama omba ema dafi OTSE tso mani.

² <<Nu otsema yi oneema mmwe.>> Lubana li ola ongwī ababo ndze yi ondu odzeedze mi ele aani.

³ <<Gyo no to lo ema tishi, ni abu di gyiiye mi ese ngwi OTSE kye nu ema neni.>>

⁴ Etsengwe, ka dze moga-moga yi engwe ema ba na; tatase yo nye ma mi ofe mgbi OTSE.

Ofyee yi engyukwo mgbi ama

⁵ Ofyee, siikye nu engyukwo mgbi ema emi ese ne yi mmwe yi imio ewo, yi itukwu asisa, yeye dafi ema ka sunu iKrestu mani.

⁶ Ka siikye nu ma ikyegbee, ni ema tu umba mboma mi onɔ a kye ine byi ema ma ta ba, kpaa no li dafi ofyee mgbi iKrestu, nle kyo owitukwu Imgbasho mi itukwu asisa mani.

⁷ Kyon itukwu asisa, dafi ema le kyo Otse ido mani, no ka dze dafi ema le kyido mgbi inggise ba.

⁸ Lubana ema ye Otse ka nu ali inggise duu umba mi alungwo osuse ngwi otsungwo kyo, kini otsungwo li ofyee hona dubewon kpaa.

⁹ Engyukwo mgbi emi ofyee, ema kpaa kyo yi ofyee mgbi ema saan nghan na. Ka tongwine wo ma ba, ikyesine ema duu dze yi ongyukwo onyi ndze esho, o di li tso osadu-sadu ba.

Okyiika mgbi Imgbasho

¹⁰ Ongyeengye yo, kwudze kpoklɔ mbi Otse beyi mfye mgban onghaangha na.

¹¹ Gbe okyiika mgbi Imgbasho duu wo ewo zukwu ni ema twafɔ ese yi ewe mgbi olodu.

¹² Lubana ika mgbi eyi li mgbi mmbwe yi eyi ba, kpaa li okye afɔ twese yi emi otu, ama okye ese teyi, yi ama a kye mfye nu ma, beyi abumfye mgbi onodzi ibwubwe emi esho.

¹³ Nghawanɛ, gbe okyiika mgbi Imgbasho duu wo ewo na, ikye ni egbe obube na wa ba yo, ni ema yagba kwudze kpoklɔ, ni ika wa ngye kpaa, ni ema di yagba kwudze kpoklɔ mani.

14 Nghane kwudze kpɔklɔɔ, kye okpa mgbi otsitsi bwa oshi, kye abu ika mgbi osaan wo ewo.

15 Ewo owoowo mgbi ema ogbeeso iyu ne, no dze dafi okpafɔ mi afɔ mani.

16 Ombwo ikye ungwɔ ntonɛ yɔ, oyeyɛ onuunu mgbi ema no dze dafi okpalika mani, ta ema ka yagba na ewema mi ali oshi nkyɛ yi amoola mbi ibwubwe inggise nani.

17 Kye osakye ika mgbi owatɔ-watɔ tukwu beyi okwusunkli mgbi Onodzi, nli elodze Imgbasho nani.

18 Dika tonya obibo ba. Alonɔ duu le bɔ ali itiibo mi mfye mgbi Onodzi. Kwasisa dile bibo alonɔ ikye emi osaan duu.

19 Bibo ikye ani kpaa na, adzi ni alonɔ ngwi ani kwulu ondu duu yɔ, ni a nu ani elodze ngwi ani ka gbɔ iba mgbi eso osuse ne yi imio ba mani.

20 Ani kale gbeeso ne kye ngwi ani wodze itse ne kpaa, dafi inggise ogbikye Imgbasho mani. Nghane bibo na ni ani kiyayi ogbeeso ne yi abɔ otsigegɛ dafi ani kika gbɔn mani.

Angba ongwi olele

21 N le dɔ iTaciko ongwuneyi osuse ongbido otso oyeyɛ mbi Otse ne eso mbi ema, ikye ni ema ye alungwɔ duu ni ema di ye dafi ani dze beyi ungwɔ ama ani le kyɔ mani.

22 Itɔdze yeyɛ ngwi ani le dɔn eso mbi ema yɔ, li ikye ni ema ye dafi eyi dze mani, no di fyi ema mfye itukwu.

23 N bibo gbɛ Imgbasho Otseyi yi Otse iYesu iKrestu no nu iyu, yi okpitukwu, beyi oyeyɛ onuunu mbi emi iKrestu duu!

²⁴ Elela mgbi Imgbasho no dze yi ali inggise nle kiyayi odi Otse mgbi eyi iYesu iKrestu kpan itukwu mani. No dze ngha.

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90